

求如願所履平安出入行藏常蒙吉慶所為
利益所欲隨心於是衆等聞說此經皆大歡
喜信受奉行

太上靈寶天尊說禳災度厄經

太上神呪延壽妙經

爾時

元始天尊敕護益算濟人身命疾病苦厄是
時

道君長跪稽首一心除亂衆惡消滅甲子將

軍生我益算

天尊所願願得成就尋聲往救壽算天年世
世不休流通无礙符破五虛六耗惡夢妨官
復連呪詛若能受持此經不相加害符保百
年若有年厄月厄日時衆厄佩符之後無有
厄忌若能受此經延年益算過度災厄壽命
延長拔贖年命簿中斷死文昌宮中注上生
名六齋十直甲子庚申本命八節誦念是經
魂神澄正素髮還青身心安定萬願從心三
河四海九江八極諸真人等仙童玉女三界
地祇三官九署一切神明聞持此經即為消
除一切苦惱頑逆醜惡無量大罪輕師誦道
穢藉天經奸邪偷盜貪利入身皆蒙釋散日
夜六時誦念是經五瘟疫毒未離家門世上
凶魔奔馳萬里急急如律令

太上神呪延壽妙經